

cartografía de palabras
repetir cada signo dentro da cuadrícula
papel en branco
pozo infindo
as palabras esvaran
por iso sempre cuadrículas
para salvalas
pequenas casas onde vivir para sempre

morreu
de peste
o limoeiro

vina chegar
dende a fiestra
tantas tardes
as follas negras
os citróns secos
ula prata aceda?
as espiñas da infancia
aínda infectas

amor
que sostés os meus pulsos coma se foran
cuncas diminutas de cerámica chinesa

e non sabes que as cereixas
deixaron de medrar
ata que volvas

o remedio do DOCTEUR PINARD
chegou dende PARIS-COURBEVOIE
á casa do Mión
a botella
contiña a debilidade da recién parida
o calcio anegado
as xaculatorias
e agora
nin rastro dos cinco fillos
e o vidro francés abono dos
os castiñeiros da horta

anicada
ando a pensar palabras
pelas de manteiga
mentres o fume
se extingue
na mañá
cómo dicer
que marchaches
e eu
sen saber usar
a desnatadora